

I. DISPOSICIÓN XERAIS

MINISTERIO DA PRESIDENCIA

3471 *Real decreto 170/2010, do 19 de febreiro, polo que se aproba o Regulamento de centros de recoñecemento destinados a verificar as aptitudes psicofísicas dos condutores.*

Os centros de recoñecemento destinados a verificar as aptitudes psicofísicas dos condutores, así como os informes de aptitude psicofísica que emiten no exercicio das súas actividades regúlanse, por unha banda, no Real decreto 1467/1982, do 28 de maio, polo que se determinan as enfermidades e deficiencias que poden impedir a obtención ou revisión dos permisos de condución ou restricións a estes e as condicións que deben reunir os certificados e recoñecementos correspondentes, desenvolvido pola Orde do 22 de setembro de 1982.

E, por outra banda, no Real decreto 2272/1985, do 4 de decembro, modificado polo Real decreto 1342/1986, do 26 de maio, polo que se regulan as aptitudes psicofísicas que deben posuír os condutores de vehículos e polo que se regulan os centros de recoñecemento destinados a verificálas, desenvolvido pola Orde do 13 de maio de 1986.

Todas estas normas son anteriores ao texto articulado da Lei sobre tráfico, circulación de vehículos de motor e seguridade viaria, aprobado polo Real decreto lexislativo 339/1990, do 2 de marzo, e ás súas normas de desenvolvemento, o que supuxo que parte do seu contido se entenda afectado por esa normativa, resultando en ocasións difícil saber se algún precepto en concreto está ou non en vigor, o que, unido á dispersión normativa que supón a regulación dunha mesma materia en varias normas, ten producido unha certa inseguridade xurídica neste ámbito.

Ademais, o citado texto articulado foi modificado recentemente, en materia sancionadora, pola Lei 18/2009, do 23 de novembro, que establece nos seus artigos 65 e 67, respectivamente, un novo réxime de infraccións e sancións que afecta as actividades dos centros que realicen estas clases de recoñecementos.

Por outra banda, a Lei 25/2009, do 22 de decembro, de modificación de diversas leis para a súa adaptación á Lei 17/2009, do 23 de novembro, sobre o libre acceso e exercicio das actividades de servizos, que vai incorporar parcialmente ao dereito español a Directiva 2006/123/CE do Parlamento Europeo e do Consello, do 12 de decembro, relativa aos servizos no mercado interior, modifica no seu artigo 22 o texto articulado da Lei sobre tráfico, circulación de vehículos de motor e seguridade viaria.

Entre os preceptos do texto articulado que se modifican a través da citada lei cabe destacar a modificación do penúltimo parágrafo do punto 2 do artigo 60, no cal se indica que, para os fins de garantir a seguridade viaria, o Goberno determinará os elementos persoais e materiais mínimos para o recoñecemento de condutores, seguindo os establecido na Lei 17/2009, do 23 de novembro.

Neste sentido é necesario sinalar que a actividade destes centros queda, con carácter xeral, fóra do ámbito de aplicación da Directiva 2006/123/CE do Parlamento Europeo e do Consello, do 12 de decembro. No entanto, con obxecto de dinamizar en maior medida o sector servizos e de incrementar a súa competitividade estendéronse os «principios de boa regulación» a sectores non afectados pola citada directiva, como é o caso dos centros destinados a verificar as aptitudes psicofísicas dos condutores, contribuíndo así á supresión efectiva de requisitos non xustificados ou desproporcionados e a diminuír as cargas administrativas que teñen que soportar os cidadáns.

Así mesmo, o novo Regulamento xeral de condutores, aprobado polo Real decreto 818/2009, do 8 de maio, recolle no seu anexo IV as aptitudes psicofísicas requiridas para obter ou prorrogar a vixencia do permiso ou da licenza de condución, establecendo as enfermidades e deficiencias que serán causa de denegación ou de adaptacións, restricións

de circulación e outras limitacións na súa obtención ou prórroga, conforme a Directiva 2006/126/CE do Parlamento Europeo e do Consello, do 20 de decembro, sobre o permiso de condución.

Neste contexto normativo cabe destacar, por unha banda, que, en cumprimento do mandato contido no punto 3 do artigo 27 da Lei 16/2003, do 28 de maio, de cohesión e calidade do Sistema Nacional de Saúde, se aprobou o Real decreto 1277/2003, do 10 de outubro, polo que se establecen as bases xerais sobre autorización de centros, servizos e establecementos sanitario, e que se definiron entre os centros, servizos e establecementos de carácter sanitarios, no seu punto C.2.5.10, os centros de recoñecemento.

Ao citado punto a Orde SCO/1741/2006, do 29 de maio, pola que se modifican os anexos do Real decreto 1277/2003, do 10 de outubro, deulle unha nova redacción, na que define os centros de recoñecementos como centros sanitarios onde, de acordo co previsto na súa normativa específica, se levan a cabo recoñecementos médicos e psicolóxicos para determinar as condicións físicas e psicolóxicas dos aspirantes ou titulares de permisos ou licenzas, ou para a realización de determinadas actividades e para a súa renovación.

Conforme a normativa citada, procédese, a través deste regulamento, a regular nunha única disposición normativa todos aqueles aspectos dos centros destinados a verificar a aptitude psicofísica dos condutores, procurándolle un contido ordenado e adecuado á súa finalidade.

Ademais, na súa elaboración tivéronse en conta a experiencia acumulada e as necesidades xurdidas desde a implantación dos ditos centros, tanto para a Administración como para os profesionais do sector.

En primeiro lugar, regúlase o réxime xurídico da acreditación destes centros para poder desenvolver a súa actividade como centros dedicados a verificar as aptitudes psicofísicas dos condutores, baseado, como requisito previo e indispensable, na autorización previa do centro como centro de recoñecemento pola autoridade sanitaria competente.

E na posterior acreditación como centro de recoñecemento dedicado a verificar as aptitudes psicofísicas dos condutores pola xefatura provincial de tráfico onde vaian desenvolver as súas actividades, tras comprobar que o centro cumpre os requisitos exixidos neste regulamento, procedéndose, en caso afirmativo, á súa inscrición no Rexistro de centros de recoñecemento para condutores de vehículos de motor.

Este réxime de autorización previa e posterior acreditación dos centros non supón ningún cambio en relación co réxime vixente.

Respecto dos requisitos que deben cumprir os centros, diferénciase entre os elementos persoais, que inclúen o titular, director, director facultativo, de ser o caso, e facultativos, e determínanse, con respecto a cada un deles, as súas obrigacións, prohibicións e incompatibilidades e os elementos materiais.

Os elementos persoais e materiais simplifícanse e redúcense para eliminar trabas innecesarias que dificulten o acceso e o desenvolvemento do exercicio desta actividade.

En canto aos elementos persoais, no canto de ter que contar cun médico oftalmólogo váiselles permitir aos centros concertar os servizos dunha clínica que preste servizos de oftalmoloxía, contribuíndo así a flexibilizar os requisitos exixidos aos ditos centros.

Respecto dos elementos materiais, elimínanse todos os requisitos que viñan exixindo con respecto ao local para poder recibir a acreditación como centro de recoñecemento destinado a verificar as aptitudes psicofísicas dos condutores, por entender que o local que previamente sexa autorizado pola autoridade sanitaria como centro de recoñecemento xa cumpre cos requisitos necesarios para poder desenvolver esa actividade con todas as garantías.

Cabe destacar, como novidade, que terán que contar co equipamento informático necesario para o tratamento de datos así como para a conexión electrónica cos servizos do organismo autónomo Xefatura Central de Tráfico para a transmisión do resultado do informe de aptitude psicofísica e cos rexistros de condutores e infractores e de centros de recoñecemento para condutores de vehículos de motor.

Este requisito é o resultado de lle dar cumprimento á medida número 39 do Acordo do Consello de Ministros do 13 de agosto de 2008 polo que se aproban medidas a curto prazo para reducir cargas administrativas.

Ademais, ao seren os centros os que remitirán o resultado deste informe ao Rexistro de condutores e infractores, os informes de aptitude psicofísica producirán efecto en todo o territorio nacional, eliminando a actual limitación destes informes, que só podían producir efecto na xefatura de tráfico da provincia onde estea situado o centro.

A emisión dos informes de aptitude psicofísica por medios electrónicos constitúe unha das principais novidades deste regulamento, fronte ao sistema tradicional de expedir estes informes en formato papel, entregándolle ao interesado unha copia, para os efectos da súa presentación na xefatura provincial de tráfico correspondente e de enviar unha comunicación de maneira inmediata á dita xefatura cando o informe reflicta un resultado negativo ou sexa interrompido.

Como outra novidade que cómpre destacar deste regulamento, para lle facilitar ao cidadán o cumprimento das súas obrigacións evitándolle molestias e desprazamentos innecesarios e reducir así cargas administrativas, ampliáronse as actividades que poden realizar os centros de recoñecemento de condutores ao permitir que estes poidan ofrecer como servizo complementario, de así o solicitaren os interesados, a xestión, que se poderá facer por medios electrónicos, ante a xefatura provincial de tráfico correspondente, da prórroga de vixencia do permiso ou da licenza de condución.

Desta maneira, no marco do que debe ser unha Administración moderna, áxil, eficaz e segura, contribúese a darlles un servizo de calidade aos cidadáns nos trámites que estes demandan diariamente das xefaturas provinciais e locais de tráfico, o cal exige evitarlles molestias e desprazamentos innecesarios.

En canto ao procedemento para solicitar a acreditación como centro destinado a verificar as aptitudes psicofísicas dos condutores, incluíuse a opción de poder descargar, a través da páxina de web da Dirección Xeral de Tráfico, os modelos de solicitude a que se fai referencia neste regulamento.

Ademais, simplificáronse os documentos que hai que presentar coa solicitude, bastando, con carácter xeral, coa presentación da autorización outorgada pola autoridade sanitaria competente como centro de recoñecemento, acompañada da relación do persoal autorizado e dos seus datos de identificación, así como, de ser o caso, fotocopia do certificado de inscrición no rexistro correspondente.

Ao se ter autorizado previamente pola autoridade sanitaria como centro de recoñecemento, evítase duplicar a presentación de documentos e o cumprimento de requisitos que xa foron exixidos conforme a normativa sanitaria.

Respecto ao seu funcionamento, requírese a presenza obrigada dos facultativos exixidos por este regulamento pero unicamente durante o horario en que o centro vaia realizar a súa actividade como centro destinado a verificar as actitudes psicofísicas dos condutores.

En canto aos informes de aptitude psicofísica, determínanse, entre outros aspectos, a forma en que se deberán emitir e o contido de cada un deles segundo o resultado da exploración, e distínguese entre os informes con resultado de apto, apto con condicións restritivas, non apto e interrompido.

O réxime de infraccións e sancións establece, con carácter xeral, unha remisión, por unha banda, aos puntos 4 e 6 do artigo 65 do texto articulado, que cualifica, respectivamente, como infraccións grave ou moi grave o incumprimento das normas regulamentariamente establecidas sobre o réxime de autorización e funcionamento dos centros de recoñecemento de condutores autorizados polo Ministerio do Interior, salvo que se puideren considerar moi graves ao afectaren a cualificación dos facultativos ou elementos esenciais que incidan directamente na seguridade viaria.

E, por outra banda, ao seu artigo 67, que prevé unha sanción pecuniaria cualificada e outra sanción de suspensión específica por un ano cando a infracción sexa moi grave.

Ademais, co obxecto de lles facilitar aos cidadáns o cumprimento dos trámites necesarios para iniciar esta actividade, prevese a posibilidade de que as solicitudes

respecto dos procedementos, ás cales se fai referencia neste regulamento, se poidan presentar no Rexistro Electrónico da Xefatura Central de Tráfico cando se inclúan eses procedementos no seu ámbito de aplicación, conforme o disposto na Resolución do 26 de agosto de 2007, pola que se crea este, para seguir avanzando nesta diminución das cargas administrativas dos cidadáns.

Así mesmo, conforme o estado da técnica o vaia permitindo, poderase substituír a presentación dos documentos exixidos durante o procedemento para ser acreditado como centro de recoñecemento destinado a verificar as aptitudes psicofísicas dos condutores, pola consulta aos rexistros correspondentes, para o cal se deberá solicitar previamente o consentimento do interesado, contribuíndo así a unha diminución importante das cargas administrativas para o cidadán.

Por último, recoñécese a liberalización dos centros de recoñecemento de condutores que establecen libremente os prezos aplicables ás súas actividades fronte ao réxime de tarifas, liberalización que na práctica tivo lugar a partir do ano 2002, a teor da disposición transitoria única da Lei 19/2001, do 19 de decembro, de reforma do texto articulado da Lei sobre tráfico, circulación de vehículos de motor e seguridade viaria.

Este regulamento foi sometido a informe do Consello Superior de Tráfico e Seguridade da Circulación Viaria, de conformidade co disposto no artigo 5.2.e) do Real decreto 317/2003, do 14 de marzo, polo que se regula a organización e funcionamento do Consello Superior de Tráfico e Seguridade da Circulación Viaria.

Na súa virtude, por proposta dos ministros do Interior e de Sanidade e Política Social, coa aprobación previa da ministra da Presidencia, de acordo co Consello de Estado e logo de deliberación do Consello de Ministros na súa reunión do día 19 de febreiro de 2010.

DISPOÑO:

Artigo único. *Aprobación do Regulamento de centros de recoñecemento destinados a verificar as aptitudes psicofísicas dos condutores*

Apróbase o Regulamento de centros de recoñecemento destinados a verificar as aptitudes psicofísicas dos condutores cuxo texto se insire a continuación.

REGULAMENTO DE CENTROS DE RECOÑECEMENTO DESTINADOS A VERIFICAR AS APTITUDES PSICOFÍSICAS DOS CONDUTORES

CAPÍTULO I

Os centros de recoñecemento destinados a verificar as aptitudes psicofísicas dos condutores

Artigo 1. *Obxecto.*

Este regulamento ten por obxecto determinar o réxime de acreditación dos centros de recoñecemento destinados a verificar as aptitudes psicofísicas daqueles que pretendan obter ou prorrogar as autorizacións administrativas para conducir, os requisitos que deben cumprir, así como o seu réxime de funcionamento, todo isto de conformidade co disposto no texto articulado da Lei sobre tráfico, circulación de vehículos de motor e seguridade viaria, aprobado polo Real decreto legislativo 339/1990, do 2 de marzo.

Artigo 2. *Natureza.*

Os centros que pretendan exercer a actividade de recoñecemento das aptitudes psicofísicas dos condutores deberán estar debidamente autorizados pola autoridade sanitaria correspondente para o seu funcionamento como centros de recoñecemento, de acordo coa normativa vixente.

Ademais, deberán contar coa resolución da Xefatura Provincial de Tráfico que acredite que reúnen os requisitos que sobre os elementos materiais e persoais se prevén neste

regulamento. A dita resolución servirá para a inscrición de oficio pola xefatura provincial de tráfico correspondente no Rexistro de centros de recoñecemento para condutores de vehículos de motor, a que se refire o artigo 5.h) do texto articulado da Lei sobre tráfico, circulación de vehículos de motor e seguridade viaria.

Estes centros, que poderán ter carácter oficial, dependentes da Administración, ou privado, deberanse axustar no seu funcionamento ao establecido neste regulamento.

Artigo 3. *Actividade dos centros de recoñecemento destinados a verificar as aptitudes psicofísicas dos condutores.*

1. Os centros de recoñecemento destinados a verificar as aptitudes psicofísicas dos condutores realizarán as probas e exploracións necesarias para verificar que os interesados en obter ou prorrogar a vixencia do permiso ou da licenza de condución reúnen as aptitudes psicofísicas necesarias e que non están afectados por algunha das enfermidades ou deficiencias que poden supor incapacidade para conducir ou a necesidade de establecer adaptacións, restricións ou outras limitacións, de acordo coa normativa vixente.

Así mesmo, realizarán as probas e exploracións a que se refire o parágrafo anterior a quen pretenda obter un novo permiso ou licenza de condución, unha vez que sexa declarada a perda de vixencia do que posuía tras perder a totalidade do crédito de puntos que tivese asignado ou que perda a súa vixencia de acordo co previsto no artigo 47 do Código penal, así como a quen estea obrigado a acreditar as súas aptitudes psicofísicas por desempeñar tarefas de condución ou relacionadas co ensino desta.

O resultado das probas e exploracións consignarase nun informe de aptitude psicofísica.

2. Cando así o solicite o interesado, estes centros poderán xestionar no seu nome, ante a Xefatura Provincial de Tráfico, a prórroga de vixencia dos permisos ou licenzas de condución, para o cal deberán achegar os documentos que para tales efectos requira a normativa vixente.

Esta xestión, no caso de que se realice por medios electrónicos, axustarase ao protocolo informático que se estableza por orde do ministro do Interior.

O disposto neste punto realizarase conforme o previsto na Lei 11/2007, do 22 de xuño, de acceso electrónico dos cidadáns aos servizos públicos, así como na súa normativa de desenvolvemento.

CAPÍTULO II

Requisitos dos centros de recoñecemento destinados a verificar as aptitudes psicofísicas dos condutores

Artigo 4. *Elementos persoais.*

1. Os centros de recoñecemento deberán contar, para a súa acreditación como centros de recoñecemento de condutores destinados a verificar as aptitudes psicofísicas dos condutores, cos elementos persoais mínimos seguintes:

- a) Titular
- b) Director e, de ser o caso, director facultativo
- c) E un equipo integrado polos seguintes facultativos: un médico xeral, un médico oftalmólogo e un psicólogo.

Todos eles deberán ser autorizados pola autoridade sanitaria competente para exercer a súa actividade no centro de recoñecemento.

2. No entanto, permítese que os centros, no canto de contaren cun médico oftalmólogo autorizado pola autoridade sanitaria competente, poidan concertar os servizos dunha clínica que preste servizos de oftalmoloxía, extremo que se deberá xustificar ao presentar a solicitude de acreditación do centro conforme o disposto no artigo 10. A clínica

oftalmolóxica concertada poderá realizar as exploracións tanto nas súas instalacións como nas do centro de recoñecemento.

En todo caso, deberá realizar a exploración un especialista en Oftalmoloxía cando, ao xuízo dos demais facultativos, sexa preciso o seu ditame.

Artigo 5. O titular.

1. O titular do centro de recoñecemento destinado a verificar as aptitudes psicofísicas dos condutores será a persoa física ou xurídica que sexa autorizada pola autoridade sanitaria competente como titular do centro sanitario.

2. Son obrigacións do titular do centro:

a) Controlar que o centro reúna, en todo momento, os elementos persoais e materiais mínimos exixidos.

b) Comunicar á xefatura provincial de tráfico correspondente calquera modificación no réxime de funcionamento do centro ou calquera variación dos datos que serviron de base para a súa acreditación e inscrición no Rexistro de centros de recoñecemento para condutores de vehículos de motor.

c) Estar presente nas inspeccións, cando sexa requirido para iso con antelación suficiente, e colaborar na súa realización cos funcionarios do organismo autónomo Xefatura Central de Tráfico que as practiquen.

Artigo 6. O director.

1. O director do centro será a persoa física que figure como titular deste ou forme parte da persoa xurídica que o sexa. Así mesmo, poderá actuar como director un dos seus facultativos.

Nos supostos en que o director non reúna a condición de facultativo, deberá designar un director facultativo.

2. Son obrigacións do director do centro:

a) Organizar e dirixir o desenvolvemento da actividade do centro, comprobando a observancia dos preceptos deste regulamento, en particular os relativos ao réxime de funcionamento e á actuación do persoal facultativo.

b) Coidar de que os equipamentos de exploración se atopen, en todo momento, nun bo estado de funcionamento, sen prexuízo da responsabilidade que poida corresponder ao resto do persoal que presta servizo no centro.

c) Facilitar ao organismo autónomo Xefatura Central de Tráfico ou, de ser o caso, á autoridade sanitaria competente, os informes de aptitude psicofísica emitidos, os datos e cantos informes lle sexan solicitados en relación coa actividade do centro, o seu réxime de funcionamento e a actuación do persoal facultativo adscrito a este.

d) Estar presente nas inspeccións, cando sexa requirido para iso con antelación suficiente, e colaborar cos funcionarios do organismo autónomo Xefatura Central de Tráfico durante a realización daquelas.

3. O director do centro ou, de ser o caso, o director facultativo se aquel non reúne a condición de facultativo, será o responsable de que as probas se realicen nas súas instalacións de acordo co protocolo de exploración médico-psicolóxica que, para tales efectos, editen os ministerios do Interior e de Sanidade e Política Social, así como da sinatura do informe de aptitude psicofísica e do ditame final do modelo de historia clínica que figuran nos anexos II e III, respectivamente.

Artigo 7. Os facultativos.

Os facultativos, dentro do ámbito de competencias das súas respectivas titulacións e logo de identificación dos interesados mediante a presentación do documento nacional de identidade ou tarxeta de identidade de estranxeiro ou, de ser o caso, do pasaporte ou documento de identidade e número de identidade de estranxeiro, os cales deben estar en

vigor, e, de ser o caso, do permiso ou da licenza de condución de que sexan titulares, terán as seguintes obrigacións:

- a) Realizar eficazmente os recoñecementos e exploracións de acordo co exposto neste regulamento e no protocolo a que se refire o punto 2 do artigo 6
- b) Asinar os ditames parciais que emitan.
- c) Estar presentes nas inspeccións que se poidan realizar ao centro durante o seu horario de funcionamento como centro de recoñecemento destinado a verificar as aptitudes psicofísicas dos condutores

Artigo 8. *Incompatibilidades.*

Ao persoal do organismo autónomo Xefatura Central de Tráfico, así como ao dos servizos equivalentes das comunidades autónomas que teñan transferidas as competencias executivas en materia de tráfico e circulación de vehículos de motor, mentres permaneza en activo, seralle de aplicación a normativa vixente en canto ao réxime de incompatibilidades.

Artigo 9. *Elementos materiais.*

1. Os centros de recoñecemento destinados a verificar as aptitudes psicofísicas dos condutores deberán cumprir os requisitos exixidos pola normativa vixente e polas disposicións relativas ás condicións básicas e de accesibilidade universal das persoas con discapacidade e, ademais, dispor:

- a) Do equipamento informático necesario que permita o tratamento de datos así como a conexión electrónica cos servizos do organismo autónomo Xefatura Central de Tráfico para a transmisión do resultado do informe de aptitude psicofísica e cos rexistros de condutores e infractores e de centros de recoñecemento para condutores de vehículos de motor.
- b) O material adecuado para realizar as exploracións que se relaciona no anexo I, que se deberá atopar, en todo momento, en bo estado de funcionamento, calibrado e conservación.

2. O local do centro de recoñecemento que reciba a acreditación como centro de recoñecemento destinado a verificar as aptitudes psicofísicas dos condutores deberá estar debidamente identificado mediante un rótulo situado nun lugar visible desde o exterior, no cal deberán constar, polo menos, a súa denominación e, en todo caso, o seu número de rexistro.

CAPÍTULO III

Acreditación e inscrición dos centros de recoñecemento destinados a verificar as aptitudes psicofísicas dos condutores

Artigo 10. *Acreditación dos centros de recoñecemento destinados a verificar as aptitudes psicofísicas dos condutores.*

1. O titular do centro de recoñecemento autorizado pola autoridade sanitaria deberá dirixir a correspondente solicitude á xefatura de tráfico da provincia onde pretendan desenvolver as súas actividades, utilizando para iso o modelo que, para tales efectos, proporcionará o dito organismo ou que se poderá descargar na seguinte páxina web: www.dgt.es.

2. A solicitude, que deberá estar asinada polo titular do centro ou o seu representante legal, así como polo director, na cal se indicará, polo menos, a denominación, o domicilio e o horario durante o cal o centro funcionará como centro de recoñecemento destinado a verificar as aptitudes psicofísicas dos condutores.

3. Coa solicitude presentarse a seguinte documentación:

a) Fotocopia das autorizacións sanitarias de instalación e funcionamento como centro de recoñecemento outorgada pola autoridade sanitaria competente.

b) Fotocopia do certificado de inscrición no rexistro sanitario correspondente como centro de recoñecemento.

c) Relación do persoal autorizado pola autoridade sanitaria competente.

Indicaranse o nome, apelidos, número de documento nacional de identidade ou do número de identidade de estranxeiro e nacionalidade de cada facultativo, acompañado do documento acreditativo do rexistro de sinaturas de cada un deles visado polos colexios profesionais correspondentes.

d) Fotocopia, de ser o caso, do contrato coa clínica que vaia prestar os servizos de oftalmoloxía no suposto en que se vaia prescindir do médico oftalmólogo de acordo co disposto no artigo 4.

e) As declaracións por escrito do titular, do director, do director facultativo, de ser o caso, así como dos facultativos de non estaren incursos nas incompatibilidades que se indican no artigo 8.

4. A denominación dos centros estará composta pola mención «Centro de recoñecemento de condutores», seguido do seu nome comercial, sen que poida coincidir ou producir confusión con outro centro inscrito na mesma provincia, salvo que pertenza ao mesmo titular ou sexa autorizado pola autoridade sanitaria competente con esa denominación como centro de recoñecemento.

No caso de se producir esta circunstancia, a xefatura provincial de tráfico correspondente advertirallo ao solicitante dentro do dez días seguintes ao da presentación da solicitude para que modifique a súa denominación.

5. As solicitudes poderanse presentar en calquera dos lugares establecidos no punto 4 do artigo 38 da Lei 30/1992, do 26 de novembro, de réxime xurídico das administracións públicas e do procedemento administrativo común.

Artigo 11. *Inscrición dos centros de recoñecemento de condutores.*

1. A Xefatura Provincial de Tráfico ditará resolución motivada en que outorgue ou denegue a acreditación solicitada, logo de comprobación dos documentos achegados coa solicitude e do cumprimento dos requisitos establecidos neste regulamento; para estes efectos practícase unha inspección previa, conforme se establece no artigo 26.

2. No caso de que a resolución sexa favorable, procederase de oficio á súa inscrición no Rexistro de centros de recoñecemento para condutores de vehículos de motor a que se refire o artigo 2.

Na resolución indicada no parágrafo anterior asignaráselle ao centro un número de inscrición no citado rexistro, que deberá facerse constar en todos os informes de aptitude psicofísica que emita.

3. Unha vez inscrito de oficio no Rexistro de centros de recoñecemento para condutores de vehículos de motor, comunicaráselle no prazo de dez días ao titular do centro e poderá iniciar a súa actividade.

CAPÍTULO IV

Réxime de funcionamento dos centros de recoñecemento destinados a verificar as aptitudes psicofísicas dos condutores

Artigo 12. *Horario e presenza dos facultativos.*

1. O horario de funcionamento do centro de recoñecemento como centro de recoñecemento destinado a verificar as aptitudes psicofísicas dos condutores deberá figurar exposto ao público nun lugar facilmente accesible e visible desde o exterior.

2. Será obrigada a presenza no centro de, polo menos, un facultativo por especialidade durante o horario de funcionamento como centro de recoñecemento destinado a verificar

as aptitudes psicofísicas dos condutores, salvo ausencia accidental xustificada e razoable, durante a cal non poderán ser emitidos informes de aptitude, salvo que o facultativo ausente fose substituído por un suplente.

3. Logo de comunicación á Xefatura Provincial de Tráfico, os centros de recoñecemento poderán verificar as aptitudes psicofísicas dos internos no seu respectivo centro penitenciario.

Artigo 13. *Modificación no réxime de funcionamento.*

1. Calquera modificación no réxime de funcionamento do centro ou calquera variación dos datos que serviron de base para a súa acreditación e posterior inscrición no Rexistro de centros de recoñecemento para condutores de vehículos de motor deberá ser comunicada polo seu titular, antes da data en que se produza, á xefatura provincial de tráfico correspondente, a cal, logo das comprobacións que sexan procedentes, a autorizará ou, de ser o caso, a denegará motivadamente.

No caso de que esa variación tivese que ser comunicada e autorizada previamente pola autoridade sanitaria competente, bastará coa presentación de fotocopia da citada autorización e, de ser o caso, do certificado da súa inscrición no correspondente rexistro.

En caso contrario haberá que presentar a documentación, na parte que corresponda, conforme as exigencias previstas no punto 3 do artigo 10.

2. De a variación afectar unicamente o réxime de horario do centro como centro de recoñecemento destinado a verificar as aptitudes psicofísicas dos condutores, a modificación comunicarse, antes da data en que se produza, só para os efectos da súa anotación no correspondente rexistro.

Artigo 14. *Suspensión e cesamento das actividades do centro.*

1. A actividade do centro como centro de recoñecemento destinado a verificar as aptitudes psicofísicas dos condutores poderá quedar en suspenso, durante un período máximo dun ano, coa mera comunicación previa feita polo seu titular á xefatura provincial de tráfico correspondente. Tal circunstancia inscribírase no Rexistro de centros de recoñecemento para condutores de vehículos de motor.

Transcorrido o dito prazo, de o titular do centro non comunicar a continuación da actividade, procederase de oficio á cancelación da inscrición do centro no Rexistro de centros de recoñecemento para condutores de vehículos de motor.

2. A baixa do centro por cesamento da actividade como centro de recoñecemento destinado a verificar as aptitudes psicofísicas dos condutores deberá ser comunicada polo seu titular, no prazo máximo de dez días contados desde a data en que o feito se produciu, á xefatura provincial de tráfico da provincia onde estea radicado, que procederá de oficio á cancelación da súa inscrición no Rexistro de centros de recoñecemento para condutores de vehículos de motor.

3. Se durante, polo menos, un ano continuado, o centro deixar de expedir informes de aptitude psicofísica ou os emitir por outros medios distintos aos medios electrónicos exigidos neste regulamento, cancelarase de oficio a súa inscrición no Rexistro de centros de recoñecemento para condutores de vehículos de motor, deixando desde ese momento de estar acreditado para realizar as actividades a que se refire o artigo 3.

4. Unha vez cancelada a inscrición do centro no referido rexistro, para poder volver realizar as actividades como centro de recoñecemento destinado a verificar as aptitudes psicofísicas dos condutores, será necesario que o seu titular volva presentar a solicitude correspondente, de acordo co procedemento establecido neste regulamento.

5. A revogación da autorización sanitaria do centro comportará a cancelación de oficio da inscrición do centro no Rexistro de centros de recoñecemento para condutores de vehículos de motor, deixando desde ese momento de estar acreditado para realizar as actividades a que se refire o artigo 3.

CAPÍTULO V

Informes de aptitude psicofísicaArtigo 15. *Informe de aptitude psicofísica.*

1. O resultado da exploración consignarase nun informe que se redactará no modelo oficial de impreso que se recolle no anexo II. Este informe será asinado polo director do centro ou, de ser o caso, polo director facultativo, que se fará responsable do seu contido e, posteriormente, será entregado ao interesado.

2. O centro deberá comunicar ao Rexistro de condutores e infractores, por medios electrónicos e de forma inmediata, o resultado do informe segundo se determina no artigo 16, segundo o previsto no punto 6 do artigo 27 da Lei 11/2007, do 22 de xuño.

A comunicación electrónica axustarase ao protocolo informático que se estableza por orde do ministro do Interior e deberá conter, en todo caso, os datos persoais do solicitante e unha fotografía das mesmas características exixidas para a obtención do permiso ou licenza de condución pola normativa vixente.

3. Os datos da exploración efectuada faranse constar no modelo de historia clínica que se recolle no anexo III.

4. Os efectos do informe terán unha vixencia de noventa días, contados desde o día seguinte ao da súa emisión, salvo que, iniciado un procedemento para a obtención ou prórroga de vixencia dunha autorización administrativa para conducir, pase a formar parte deste.

5. O centro deberá conservar durante un prazo de dez anos o contido dos informes emitidos, incluídos os ditames dos facultativos, médicos e psicólogos que interveñan no recoñecemento, os informes complementarios que, de ser o caso, se presentaron e, no suposto a que se refire o punto 2 do artigo 3, ademais, os documentos que sexan achegados polo interesado.

Artigo 16. *Clases de informes de aptitude psicofísica.*

Os informes de aptitude psicofísica, tendo en conta o resultado da exploración, clasificaranse de apto, apto con condicións restritivas, non apto e interrompido.

Artigo 17. *Informe con resultado de apto.*

Estes informes indican que o interesado non padece enfermidade ou deficiencia que lle impida obter ou prorrogar un permiso ou licenza de condución ordinarios. No entanto, de existir algunha causa que fundamente a apreciación contraria, a xefatura provincial de tráfico correspondente poderá solicitar calquera medida exploratoria que considere oportuna.

Artigo 18. *Informe con resultado de apto con condicións restritivas.*

Estes informes indican que o interesado, ao padecer algunha enfermidade ou deficiencia que lle impide obter ou prorrogar o permiso ou licenza de condución ordinarios, unicamente é considerado apto para obter ou prorrogar un permiso ou licenza de condución extraordinario, suxeito ás condicións restritivas ou adaptacións que procedan en función da enfermidade ou deficiencia que padeza.

Os informes emitidos polo centro de recoñecemento de condutores só poderán establecer as restricións de circulación ou adaptacións que a normativa vixente admita para a clase de permiso ou licenza de condución de que se trate.

No caso de que o centro entenda que o permiso debe conter adaptacións ou restricións, estas consignarase no informe de acordo cos códigos establecidos na normativa vixente. Todo isto sen prexuízo de que a Xefatura Provincial de Tráfico, logo de informe da autoridade sanitaria de se considerar oportuno, poida establecer outras distintas á vista do caso concreto.

Artigo 19. *Informe de non apto.*

Estes informes indican que o interesado, no momento do recoñecemento, ao non reunir as aptitudes psicofísicas requiridas, é considerado non apto para conducir, obter ou

prorrogar calquera permiso ou licenza de condución, ordinario ou extraordinario, coa excepción, de ser o caso, da licenza que autoriza a conducir vehículos para persoas de mobilidade reducida, sen prexuízo de que posteriormente as poida adquirir ou recuperar.

Artigo 20. Informes interrompidos por inactividade do interesado.

Os informes de recoñecemento interrompidos por inactividade do interesado, xa sexa porque desistiu de continuar realizando o recoñecemento, por non se presentar para ultimalo, ou por non achegar algún informe complementario que se lle requiriu, determinarán a imposibilidade de expedir informe ningún ata que o interesado realice as actuacións pendentes.

Artigo 21. Contraste e discrepancia de informes de aptitude psicofísica.

Os informes emitidos con resultado de non apto poderán ser contrastados por petición do interesado, á súa custa, mediante o recoñecemento pola autoridade sanitaria correspondente. Poderá achegar cantos informes ou certificados médicos ou psicolóxicos considere conveniente, co fin de acreditar a aptitude e que non carece do requisito que presuntamente non posúe.

En caso de discrepancia entre informes atenderase ao que resolva a autoridade sanitaria correspondente ao domicilio do interesado. A Xefatura Provincial de Tráfico, unha vez recibido o ditame da autoridade sanitaria, anotaráo no Rexistro de condutores e infractores e porá en coñecemento dos centros interesados.

Artigo 22. Outras enfermidades ou deficiencias.

Se o centro que estea a realizar o recoñecemento detecta que un solicitante, malia non padecer algunha das enfermidades ou deficiencias relacionadas no anexo IV do Regulamento xeral de condutores, aprobado polo Real decreto 818/2009, do 8 de maio, non está en condicións para que lle sexa expedido ou prorrogada a vixencia do seu permiso ou licenza de condución, comunicarllo, indicando as causas, á xefatura provincial de tráfico correspondente para que resolva, logo de informe dos servizos sanitarios competentes, o que proceda.

Artigo 23. Libro rexistro de informes.

Os centros deberán levar un rexistro informático no cal, diariamente, se anoten todos os informes de aptitude psicofísica emitidos. Estes deberán constar no rexistro correlativamente numerados, consignándose o resultado das probas practicadas. O dito rexistro deberá estar en todo momento á disposición da autoridade sanitaria ou do organismo autónomo Xefatura Central de Tráfico.

Os datos que consten no libro rexistro deberán ser conservados polo centro durante, polo menos, dez anos.

CAPÍTULO VI

Rexistro de centros de recoñecemento para condutores de vehículos de motor

Artigo 24. O Rexistro de centros de recoñecemento para condutores de vehículos de motor.

1. O Rexistro de centros de recoñecemento para condutores de vehículos de motor a que se refire o artigo 5.h) do texto articulado da Lei sobre tráfico, circulación de vehículos de motor e seguridade viaria será levado e xestionado pola Dirección Xeral de Tráfico.

2. Este rexistro ten por finalidade recoller e xestionar de forma automatizada os datos referidos aos centros acreditados para a realización da actividade a que se refire o artigo 3, aos seus titulares, directores e aos facultativos adscritos a estes, conforme o previsto na Lei 11/2007, do 22 de xuño, así como na súa normativa de desenvolvemento.

3. O titular do órgano responsable do rexistro ou ficheiro automatizado adoptará as medidas de xestión e organización que sexan necesarias para asegurar, en todo caso, a

confidencialidade, seguridade e integridade dos datos automatizados de carácter persoal existentes no rexistro, e o uso destes para as finalidades para as cales foron recollidos.

Artigo 25. Datos que deben figurar no rexistro.

No Rexistro de centros de recoñecemento para condutores de vehículos de motor deben constar, con respecto a cada un deles, os datos seguintes:

- a) O seu número de rexistro provincial, denominación, domicilio e código postal, números de teléfono, fax, así como o seu enderezo electrónico.
- b) As datas da súa autorización pola autoridade sanitaria correspondente e as da súa acreditación e inscrición no Rexistro de centros de recoñecemento para condutores de vehículos de motor.
- c) Os datos relativos ao seu titular, director, director facultativo, de ser o caso, e persoal facultativo coas especialidades ás cales pertence cada un, incluíndo a nacionalidade de cada un deles.
- d) Os datos referidos aos informes que emita o centro, e o resultado destes.
- e) Os datos sobre as inspeccións realizadas ao centro polo organismo autónomo Xefatura Central de Tráfico e as sancións que, de ser o caso, lle impoñan.
- f) O seu réxime de horario como centro de recoñecemento destinado a verificar as aptitudes psicofísicas dos condutores.

CAPÍTULO VII

Inspeccións, infraccións e sancións

Artigo 26. Inspeccións.

1. Sen prexuízo das que poidan corresponder á autoridade sanitaria competente, o persoal do organismo autónomo Xefatura Central de Tráfico poderá realizar inspeccións aos centros de recoñecemento destinados a verificar as aptitudes psicofísicas dos condutores en calquera momento e en cantas ocasións se considere conveniente para os únicos efectos de comprobar que cumpren os requisitos exixidos por este regulamento.

En todo caso, realizarase unha inspección previa á acreditación e inscrición do centro no Rexistro de centros de recoñecemento para condutores de vehículos de motor, así como ás modificacións que afecten os seus locais e instalacións.

A dita inspección deberase realizar no prazo de quince días hábiles contados desde a data da solicitude ou desde a data da comunicación da modificación, respectivamente.

2. As inspeccións que realice o persoal do organismo autónomo Xefatura Central de Tráfico en ningún caso se poderán referir aos aspectos sanitarios.

3. Para efectuar a inspección, os funcionarios comisionados terán acceso aos locais, documentación regulamentaria e material de exploración, identificando o titular, director, director facultativo, de ser o caso, e facultativos que presten servizo no centro.

4. De cada visita de inspección elaborárase unha acta da cal se lle facilitará copia ao titular ou ao director do centro.

Artigo 27. Infraccións.

As infraccións ás normas contidas neste regulamento terán a consideración de infraccións graves ou moi graves, de acordo co establecido nos puntos 4 e 6 do artigo 65 do texto articulado da Lei sobre tráfico, circulación de vehículos de motor e seguridade viaria, todo isto sen prexuízo da aplicación do réxime de infraccións e sancións da normativa sanitaria e do correspondente colexio profesional respecto ao persoal que realice funcións sanitarias.

Artigo 28. Sancións.

1. As infraccións ás normas contidas neste regulamento, de acordo co establecido no punto 2 do artigo 67 do texto articulado da Lei sobre tráfico, circulación de vehículos de motor

e seguridade viaria, poderán ser sancionadas cunha multa de 200 euros as infraccións graves, e cunha multa de entre 3.000 euros e 20.000 euros as infraccións moi graves; poderase impor a sanción da suspensión por un prazo de ata un ano da eficacia da súa inscrición no Rexistro de centros de recoñecemento para condutores de vehículos de motor.

2. Durante o prazo de tempo que dure a suspensión, o titular do centro non poderá solicitar unha nova acreditación e inscrición no citado rexistro para realizar esas mesmas actividades.

3. A realización das actividades a que se refire o artigo 3 durante o tempo de suspensión comportará unha nova suspensión por un período de seis meses, ao se cometer o primeiro quebrantamento, e dun ano de se producir un segundo ou sucesivos quebrantamentos.

Disposición adicional primeira. *Referencias á Xefatura Provincial de Tráfico neste regulamento.*

Entenderase que todas as referencias á Xefatura Provincial de Tráfico inclúen tamén as xefaturas locais de tráfico de Ceuta e de Melilla.

Disposición adicional segunda. *Datos persoais e información clínica.*

As disposicións contidas neste regulamento e nos seus anexos que afecten o tratamento dos datos persoais aplicaranse de acordo co disposto na Lei orgánica 15/1999, do 13 de decembro, de protección de datos de carácter persoal, así como na Lei 41/2002, do 14 de novembro, básica reguladora da autonomía do paciente e dereitos e obrigacións en materia de información clínica.

Disposición adicional terceira. *Presentación de solicitudes no Rexistro Electrónico da Xefatura Central de Tráfico.*

As solicitudes respecto dos procedementos ás cales se fai referencia neste regulamento poderanse presentar no Rexistro Electrónico da Xefatura Central de Tráfico, cando se inclúan eses procedementos no seu ámbito de aplicación, conforme o disposto na Resolución do 26 de agosto de 2007, pola que se crea este.

Disposición adicional cuarta. *Substitución da presentación de documentos polo consentimento para acceder ao rexistro correspondente.*

Conforme o estado da técnica o vaia permitindo, poderase substituír a presentación dos documentos exixidos no punto 3 do artigo 10 pola consulta aos rexistros correspondentes, para o cal se deberá solicitar previamente o consentimento do interesado.

Disposición adicional quinta. *Instrumentos de colaboración e de cooperación.*

O Ministerio do Interior e o Ministerio de Sanidade e Política Social establecerán, no exercicio das súas respectivas competencias, mecanismos de colaboración e cooperación.

Así mesmo, e de conformidade cos principios de colaboración e cooperación entre as administracións públicas, entre o Ministerio do Interior e as comunidades autónomas poderanse subscribir convenios e acordos para instrumentar plans de inspección conxuntos dos centros, para os efectos de levar a cabo os intercambios de información necesarios

Disposición transitoria primeira. *Implantación da comunicación por medios electrónicos nos centros de recoñecemento destinados a verificar as aptitudes psicofísicas dos condutores.*

A implantación efectiva da comunicación por medios electrónicos dos informes de aptitude psicofísica, de conformidade co establecido no artigo 15, poderá ser efectuada de forma progresiva en función da dispoñibilidade polos centros de recoñecemento dos medios necesarios para iso.

En todo caso, unha vez transcorrido o prazo máximo de seis meses desde a entrada en vigor deste regulamento, só se admitirán os informes de aptitude psicofísica que emitan os centros por medios electrónicos.

Unha vez transcorrido ese prazo de tempo, teranse por non emitidos, para os efectos do punto 3 do artigo 14, aqueles informes de aptitude psicofísica que se emitan por outros medios distintos, sen prexuízo do establecido no artigo 15.

Disposición transitoria segunda. *Procedementos iniciados con anterioridade á entrada en vigor deste regulamento.*

Os procedementos para a acreditación como centro de recoñecemento destinado a verificar as aptitudes psicofísicas dos condutores, que estean en tramitación no momento da entrada en vigor deste regulamento, seguiranse rexendo, ata a súa terminación, polas normas vixentes no momento da súa iniciación.

Disposición derogatoria única. *Derrogación normativa.*

Quedan derogados:

a) O Real decreto 1467/1982, do 28 de maio, polo que se determinan as enfermidades e deficiencias que poden impedir a obtención ou revisión dos permisos de condución ou restricións a estes e as condicións que deben reunir os certificados e recoñecementos correspondentes.

b) O Real decreto 2272/1985, do 4 de decembro, polo que se determinan as aptitudes psicofísicas que deben posuír os condutores de vehículos e polo que se regulan os centros de recoñecemento destinados a verificalas, e o Real decreto 1342/1986, do 26 de maio, polo que se modifica.

c) A Orde do 22 de setembro de 1982 pola que se desenvolve o Real decreto 1467/1982, do 28 de maio, polo que se determinan as enfermidades e deficiencia que poden impedir a obtención ou revisión dos permisos de condución ou restricións a estes e as condicións que deben reunir os certificados e recoñecementos correspondentes.

d) A Orde do 13 de maio de 1986 pola que se desenvolve o Real decreto 2272/1985, do 4 de decembro, polo que se determinan as aptitudes psicofísicas que deben posuír os condutores de vehículos e polo que se regulan os centros de recoñecemento destinados a verificalas.

Derróganse, así mesmo, cantas disposicións de igual ou inferior rango se opoñan ao disposto neste regulamento.

Disposición derradeira primeira. *Fundamento competencial.*

Este real decreto dítase ao abeiro do artigo 149.1.21^a da Constitución, que reserva para o Estado a competencia en materia de tráfico e circulación de vehículos de motor.

Disposición derradeira segunda. *Competencias transferidas ás comunidades autónomas.*

En virtude do disposto no Real decreto 391/1998, do 13 de marzo, sobre traspaso de servizos e funcións da Administración xeral do Estado á Xeneralidade de Cataluña en materia de tráfico e circulación de vehículos de motor, a dita comunidade autónoma exercerá as funcións de execución que se detallan neste regulamento.

Disposición derradeira terceira. *Habilitación e desenvolvemento.*

Facúltase o ministro do Interior para ditar as disposicións necesarias para a aplicación e desenvolvemento do previsto neste regulamento.

Así mesmo, queda facultado o ministro do Interior para modificar mediante orde os anexos deste regulamento. A modificación dos anexos I e III exixirá, en todo caso, a conformidade da ministra de Sanidade e Política Social.

Disposición derradeira cuarta. *Entrada en vigor.*

O disposto neste regulamento entrará en vigor aos dous meses da súa publicación no «Boletín Oficial del Estado».

Dado en Madrid o 19 de febreiro de 2010

JUAN CARLOS R.

A vicepresidenta primeira do Goberno
e ministra da Presidencia,
MARÍA TERESA FERNÁNDEZ DE LA VEGA SANZ

ANEXO I

Material de exploración mínimo

Todo centro de recoñecemento de condutores deberá dispor, como mínimo, do material necesario para, cando menos, efectuar as exploracións e analizar as capacidades que a continuación se indican, permitindo, ademais, avaliar as aptitudes recollidas na normativa vixente.

1. Para a exploración oftalmolóxica:
 - a. Agudeza visual a distancia.
 - b. Agudeza visual próxima.
 - c. Campo visual.
 - d. Capacidade de visión tras cegamento e capacidade de recuperación tras este.
 - e. Visión mesópica.
 - f. Motilidade ocular extrínseca.
 - g. Estereoscopia.
 - h. Visión da cor.
 - i. Exploración do segmento anterior do ollo.
 - j. Oftalmoscopia directa.
 - k. Presión intraocular.
 - l. Potencia de cristais correctores.
2. Para a exploración médica xeral:
 - a. Estudo audiométrico.
 - b. Estudo otoscópico.
 - c. Valoración da forza muscular.
 - d. Presión arterial.
 - e. Auscultación cardio-pulmonar.
 - f. Estudo de reflexos.
 - g. Estatura.
 - h. Electrocardiografía.
 - i. Probas de control de glicemia.
3. Para a exploración psicolóxica:
 - a. Material para diagnóstico clínico e de personalidade.
 - b. Probas libres de nesgos culturais para avaliar:
 - Intelixencia práctica.
 - Intelixencia xeral.
 - c. Equipamento homologado para avaliar:
 - Estimación do movemento.
 - Coordinación vasomotora.
 - Tempo de reaccións múltiples.

ANEXO II

MODELO DE INFORME DE APTITUDE PSICOFÍSICA

INFORME DE APTITUDE PSICOFÍSICA

DATOS DO CENTRO DE RECOÑECEMENTO DE CONDUTORES (CRC)		
NÚM. REX. CRC:	NOME DO CRC:	
DIRECTOR DO CRC:		
DATOS DO INTERESADO		
FOTO	DNI-NIE	DATA DE NACEMENTO:
	APELIDOS:	
	NOME:	
INFORME DA EXPLORACIÓN PSICOFÍSICA		
CLASE DE PERMISO OU LICENZA <input type="checkbox"/> AM <input type="checkbox"/> A1 <input type="checkbox"/> A2 <input type="checkbox"/> A <input type="checkbox"/> B <input type="checkbox"/> B+E <input type="checkbox"/> BTP <input type="checkbox"/> C1 <input type="checkbox"/> C1+E <input type="checkbox"/> C <input type="checkbox"/> C+E <input type="checkbox"/> D1 <input type="checkbox"/> D1+E <input type="checkbox"/> D <input type="checkbox"/> D+E <input type="checkbox"/> LCM <input type="checkbox"/> LVA	RESULTADO DA EXPLORACIÓN <input type="checkbox"/> APTO <input type="checkbox"/> APTO CR <input type="checkbox"/> NON APTO	PARA <input type="checkbox"/> OBTER <input type="checkbox"/> PRORROGAR <input type="checkbox"/> RECUPERAR
ENFERMIDADES OU DEFICIENCIAS	CONDICIÓN RESTRICTIVAS	

En _____, o _____ de _____

Selado e asinado: _____

NÚMERO DE REXISTRO TELEMÁTICO NA DIRECCIÓN XERAL DE TRÁFICO

ANEXO III

MODELO DE HISTORIA CLÍNICA

<p>O interesado declara non ter desfigurado a verdade nin ocultado a existencia de enfermidade ou defecto no recoñecemento psicofísico a que foi sometido.</p>	
----------------------------------------------------------------------------------------------------------------------------------------------------------------	--

DP DATOS PERSOAIS

1 N° de expediente:	2 Idade:	3 Sexo:	4 Obt/pro:	5 Clase de perm.:
6.1 Nacionalidade española	7 km percorridos			
	Día laboral	Fin de semana	7.1 Ano	7.2 % cidade
				7.3 %estrada
6.2 Outras:				
8 ¿Tivo algunha retirada ou perda de puntos do permiso de conducir?				
9 ¿Sufriu accidentes de tráfico graves* (con feridos ou vítimas) nos últimos 5 anos?				
10 ¿Sométese a revisións médicas no traballo?				
11 ¿Utiliza o coche para traballar ou para ir ao traballo?				
12 ¿En que traballa/profesión?:				

AS ANTECEDENTES E SITUACIÓN ACTUAL

SI

1 ¿Padece algunha enfermidade?				SI
2 ¿Estivo ingresado nun hospital?				SI
3 ¿Foi intervenido de ...?		SI	SI	SI
3.1 Transplante renal		3.4 Transplante cardíaco		3.7 Desfibrilador sincron.
3.2 Transplante hepático		3.5 Implante valvular		3.8 <i>By-pass</i> coronario
3.3 Transplante pulmonar		3.6 Marcapasos		3.9 Revascul. percutánea
4. ¿Toma algún medicamento ou segue algún tratamento na actualidade?				Prescritor
Medicamento		Duración (meses)		Méd. / Farm. / Autom.
4.1 Antidiabéticos /insulina		4.4 Analxésicos		4.7 Anticonvulsionantes
4.2 Anticoagulantes (sintrom*)		4.5 Hipotensores		4.8 Psicótropos
4.3 Quimioterapia		4.6 Antihistamínicos		4.9 Outros

AMX-ANAMNESE M. XERAL		SI			SI
1	¿Ten dificultade para oír?		8	¿Desmaiouse algunha vez?	
2	¿Sofre ou sufriu mareos o vertixe?		9	¿Esquécenlle as cousas facilmente?	
3	¿Ten dificultade para realizar algún movemento?		10	¿Éntralle o sono con facilidade?	
4	¿Padeceu/padece enfermidades do corazón?		11	¿Ronca habitualmente?	
5	¿Cústalle respirar durante o exercicio?		12	¿Ten dificultade para durmir?	
6	¿Tivo palpitacións ou fatiga?		13	¿Como ten a tensión arterial?	13.1 alta
7	¿Sufriu convulsións (epilepsia)?		13.2 normal		13.3 baixa
					13.4 n.s.
14	¿Toma bebidas alcohólicas?	14.1 nunca	14.2 en ocasións	14.3 1 ou máis semana	
	UBE día normal	UBE fin de semana		14.4 UBE semana	
15	¿Tomou vostede algunha substancia (estupefacientes) no último ano?				

EMX-EXPLORACIÓN MEDICINA XERAL: (* só no caso de estar indicado)

Audiometría: 500 1000 2000 4000					PR ?
OD					1.1 IPC>35%
					1.2 IPC>45%
OI					IPC%= $\frac{(PTMOM \times 7) + PTNOP}{8}$ *

INSPECCIÓN XERAL:

PR ?

PR ?

2	Inspección xeral ...		4	Estatura		*
3	Pel e mucosas ...		5	Peso		*

LOCOMOTOR/ NEUROLÓXICO:

PR ?

PR ?

6	Limitacións anatómicas		7	Limitacións funcionais	
6.1	Amputacións		7.1	Forza e ton muscular	
6.2	Deformidades/rixideces		7.2	Tremores	

CARDIO/RESPIRATORIO: PR ?

PR ?

PR ?

8	Inspección ...		12	IC- NYHA (I,II,III,IV)		15.1	Hipertensión controlada
9	Auscultación C/R		13	Ritmo		15.2	Hipert. non controlada
10	SAOS		14	Frecuencia		15.3	Hipotensión
11	Dispnea						
5	T.A. (mmHg)		Frecuencia : sistoles/minuto			Ritmo: regular/irregular	

DPMGX DITAME PARCIAL:

SI

1	NON APTO		SINATURA FACULTATIVO
2	INTERROMPIDO		
3	APTO CON RESTRICIÓN		
4	APTO		

AO ANAMNESE OFTALMOLÓXICA

SI

SI

1	¿Foi ao oftalmólogo nos últimos 5 anos?		4	¿Operárono da vista?	
2	¿Tivo ou ten algunha enferm. nos ollos?		5	¿Usa lentes ou lentes de contacto?	
3	¿Segue algún tratamento para a vista?				

EO EXPLORACIÓN OFTALMOLÓXICA (* = só no caso de estar indicado)

	Sen corrección	Con corrección					PR?		
OD	1.1	1.4	1 Agudeza visual						
			2 Dioptrías		OD	OI			
			3 Afaquias/pseudafaquia		OD	OI			
OI	1.2	1.5	4 Cirurxía refractiva						
			5 Campo central		OD	OI			
			6 T.R. cegamento						
AO	1.3	1.6	7 Visión mesópica		OD	OI			
			8 Motilidade ocular	8.1 estrabismo			8.2 forias		
				8.3 nistagmus			8.4 diplopía		
			9 Visión de cores*					11 Presión intraocular*	
10 Perimetría: outros meridianos*					12 Fondo de ollo*		OD	OI	

DPO DITAME PARCIAL SI

1 NON APTO		SINATURA FACULTATIVO
2 INTERROMPIDO		
3 APTO CON RESTRICIÓN		
4 APTO		

AP-ANAMNESE PSICOLÓXICA SI SI

1 Tomou ou toma pastillas para os nervios, a depresión ou para durmir		3 Inestabilidade laboral, social ou familiar	
2 Estivo en tratamento psiquiátrico ou psicolóxico		4 Tivo algunha baixa laboral prolongada	

EP-XERAL alt. alt. alt. alt.

1 Aseo persoal		2 Linguaxe		3 Xestos		4 Conduta (signos externos)	
----------------	--	------------	--	----------	--	-----------------------------	--

APTITUDE PERCEPTIVO-MOTORA alt.

5 Aptitude perceptivo motora							
5.1 Calidade de execución, 5.2 Comprensión instrucións, 5.3 Atención, 5.4 Concentración, 5.5 Nerviosismo- tranquilidade							
5.a Velocidade anticipación	PC TM			pre	ret		
5.b Coordinación bimanual	PC TT		PC NT				
5.c Tempo reacción múltiple	PC MR		PC ER				
5.d Intelixencia práctica							

TRASTORNOS MENTAIS E DE CONDUTA SI SI

6 Psicose		8 Deterioración cognitiva	
7 Depresión /ansiedade		9 Trastornos da intelixencia	

DPP DITAME PARCIAL: SI

1 NON APTO		SINATURA FACULTATIVO
2 INTERROMPIDO		
3 APTO CON RESTRICIÓN		
4 APTO		

DF DITAME FINAL:

1 Comentarios					
2 Administración de CONSELLO :					
Código motivo	2.1	2.2	2.3	2.4	2.5

3 INTERROMPIDO:					
Código motivo	3.1	3.2	3.3	3.4	3.5
4 PETICIÓN DE INFORME:					
Data recepción informe e /ou emisión do ditame final					

5 Enfermedades ou deficiencias recollidas no informe (anexo IV)					
Código:	5.1	5.2	5.3	5.4	5.5
6 Observacións recollidas no informe (adaptacións e/ou restricións)					
Código: INT/4151/2004	6.1	6.2	6.3	6.4	6.5

7 NON APTO		SINATURA DIRECTOR OU DIRECTOR FACULTATIVO
8 APTO CON RESTRICIÓN		
9 APTO		